

**Meeqqap napparsimanerani ullormi siullermi sulinngiffeqarsinnaatitaanerup annertusineqarnissaanut periarfissat kiisalu angajoqqaat qitornami napparsimasup angerlarsimaqatiginissaanut pitsaannerusunik periarfissiisumik ataqatigiinnerusumik aaqqiisummik pilersinissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliffeqarnermi illuatungerisat oqaloqatiginerisigut nassuiaat suliarineqassaaq, ilutigisaanillu najoqqutassani assigiinngitsuni aningaasatigut, allaffissornikkullu kingunisai ersarissarneqassallutik.**  
(Inatsisartunut ilaasortaq Pipaluk Olsen, Demokraatit)

### **Siullermeerneqarnera**

Qujanaq siulittaasoq.

Siullermik Pipaluk Olsen Demokraatiniit siunnersuuteqartoq taamatut siunnersuuteqarninni qujanaq.

Naleqqamiit erseqqissumik oqaatigissavarput: Sulisartut, angajoqqaat kisermaat, ilaqutariit, meeqqallu pisariaqartitaat ataatsimoortumik eqqarsaatigalugit aaqqissuussinerit ullutsinnut naleqqunnerusut pisariaqartinneqartut Naleqqamiit ilisimaaraagut. Taamaattumik uani siunnersuutip anguniagai tapersorsorlugit Naleqqamiit ilaqutariit peqqissut pingaartitatta ilagilluinnarmassuk siunnersuut peqataaffigissavarput.

Ullumikkut angajoqqaat napparsimasumik meeraqarunik artukkerneqartarput aningaasatigut, suliffimmut tunngatillugu, aammalu paarsisissarsioartariaqalertarneq kisermaanut atuuttarluni. Kisimiittut immikkut ittumik artukkerneqartarput, isertitaat ataasiinnaallutik.

Taavalu ilinniartut artorsarlutillu annaasaqartarput aamma ilinniartut isertitakittuusarmata. Taamaattumik Naleqqamiit kissaatigaarput aningaasatigut annaasaqaataat annikillisinneqassasut. Tassani soorunami sulisartut kattuffii, kiisalu sulisitsisut kattuffiat suleqatigilluinnarlugu eqqartuinikkut aaqqiivigineqarsinnaapput.

Isertitaat tunngavigalugit nalimmassaanermik periarfissaqartitsisoqarsinnaasoq, tassani aamma Kommuuni ilaqutariinnut sullissivik suleqatigeqqissaarlugu suliat eqqartuiffigilluarneqarsinnaapput.

Ilinniartut isertitakitsut pitsaannerusumik atugaqalernissaat siunissaq ungasinnerusooq allatut aaqqiinikkut eqqartuiffigilluarsinnaavagut. Nunatsinnimi tamakkiisumik ilinniartunut kortimik peqartitsineq ajorpugut. Nunap aaqqissuussaana ilinniartunut isertitakimmata nalimmassaaffigineqarsinnaasut arlallit ujartorsinnaavagut. Uani qulaani kort assersuutitut taavara, pisiniartarnermi atorneqartarsinnaasoq, assersuutigiinarlugu.

Anaat kisimiittut, ataatallu kisimiittut immikkut ittumik tapersorneqarnissaat, tassani soorunami ataataq anaanarlunniit meeqqap atorfissaqartittuaannarpaa, ullormiit ullormut. Taamaammatt ujaasinnaavugut taakkununga aningaasatigut pitsaasumik ujaasinissaq. Kommuuni suleqatigineqarsinnaavoq.

Meeqqat toqqissisimaneranni peqqissuunerannilu inuiaqatigiinni siunissaq pitsaanagerusoq pilersinneqartarpoq. Meeqqat amerlanerit ullaakkuuppat napparsimalersimanerminni nammineq aalajangertarpaat anaana imaluunniit ataata ilagerusunnerlugu, toqqissisimanerpaasartik toqqartarlugu. Taamaattumik angajoqqaat periarfissaqarnerulernissaat ikiorneqarnissaannut pingaaruteqarpoq, meeqqap nammineq toqqissisimaneranut naleqqussartumik angerlarsimaannarsinnaaniassammata.

Nappaatit assigiinngitsut uagut inuttut aqussinnaasanngilagut nakorsamiit ikiorneqanngikkutta, kisianni politikikkut aqqissuussinerit pitsaanagerusut aqussinnaavagut. Taamaattumik Naleqqamiit kissaatigisinnaasagut makkua eqqartorluarlugit isumassarsialattut isigineqarsinnaasut qimerloorsinnaassagigut aalingiillutalu pitsaanerpaamik anguniakkatsinnik aaliangiinissatsinnut:

Meeqqat peqqissivitsinnatik atuarfimmuut imaluunniit paaqqinnittarfimmuut ingerlaqqittarnissaat pinaveersaartinneqassasoq, tunillatsissinnaaneq annikillisinnaarlugu, tassani soorunami angajoqqaat sulisullu eqqartueqatigineqarsinnaapput, taavalu suliffik isumaqatigiinniarfigisinnaanissaa. Tassani sulisartut kattuffii suleqatigineqassasut, aaqqiissutit piviusorsiorpalaarlutik ineriartortinniarlugit, politikikkut eqqartueqatiginissai.

Suliffeqarfii oqaloqatigineqassasut, artukkerneqaannarnissaannik pinaveersaartitsilluni, sulisitisut kattuffii peqataasinnerisigut. Nunaqavissut tamarmik, illoqarfinni nunaqarfinnilu assigiimmik periarfissaqartinneqassasut, meeqqanut angajoqqaanullu naleqqussakkanik.

Naleqqap pingaartitaraa nunatsinni ilagutariinnut politikkeqarnissarput pitsaasumik, siunissaq ungasinnerusoq eqqarsaatigalugu. Nunatut siunissagissaarniarutta meeqqatta meeraanerini atugassarititaasut pitsaanerpaamik aqutissiuunneqartariaqarput, tamannalu suleqatigiinnermik, akuersaartumik oqaloqatigiinnermik, aammalu politikikkut piviusorsiorpalaarlutik aalajangiinernik siunnerfeqarluni siunnersuuteqartoqarnerani naleqqussaanissaq pisariaqartoq Naleqqamiit peqataaffigissuarput.

Nunatta avataaniit tusaamanerlugaasernerput annertoq ilorraap tungaanut saatinniarutsigu, massakkut suliamik pitsaasumik siunnerfeqarluta suleqatigiilluinnartariaqarpugut. Partiit akimorlugit suleqatigiinneq pingaaruteqarpoq, meeraq qitiutillugu siunissagissaartinniarutsigu.

Naleqqamiit oqaatigissavarput ilaqutariit toqqissisimaneranni, meeqqallu peqqissuuneranni inuiaqatigiinni ilaqutariit nukittuut pilersinneqartarput.



Taamaattumik angajoqqaat artukkerneqaannarnissaannik pinaveersaartitsineq, sulisartut atugaat pitsaanerulersinneqarnissaat, aammalu nunaqavissut tamarmik assigiimmik periarfissaqartinneqarnissaat Naleqqamiit politikikkut anguniagaqarfigissagipput tamatta suleqatigiilluta piviusunngortittariaqarippullu isumaqarpugut.

Taamaattumik uani siunnersuutip anguniagai tapersersorlugit peqataassaagut suleqatigiilluta, meeraq qitiutillugu, ilaqtariit peqqissut, siunissaq pitsaanusooq pilersinniarlugu. Ilaqtariissuserlu nuannernerusoq pilersinnissaanut Naleqqamiit peqataaffigissuarput.

Taamatut oqaaseqarluta Aningaasaqarnermut ataatsimiitsitaliamut ingerlateqqinnissaa inassutigarpugut.